



SAVALI FA'AALOALO ALE TEAM SAMOA MO TA'ALOGA O LE PASEFIKA 2023. ATU SOLOMONA

SAUNOAGA AUTU – HON. TUALA TEVAGA IOSEFO PONIFASIO AFIOGA SUI PALEMIA ASO TOFI, 2023 830AM ILE TAEAO I LUMA MAOTA OLE MALO

1. Sūsū lau susuga i le Ta'ita'i o le Sauniga, lau susuga Poasa Lusi Toiaivao (EFKS Tanugamanono);
2. Afioga i le Tama'ita'i Palemia ole Mālō o Samoa, Lau Afioga Fiamē Naomi Mata'afa;
3. Afifio afioga i Minisita ole Kapeneta ma Minisita Lagolago;
4. Alii ma Tama'ita'i Komesina o Malo mai Fafo;
5. E'e mai Pulega o Asosi Ta'aloga i Samoa nei;
6. Le mamalu o Samoa ua poto i lenei taeao;

Ou te fa'atalofa atu i lenei taeao manino ma le toto'a.

E matagofie nauā a'ao o ē aumaia le Talalelei, o ē naunau i le filemu, ma fa'ailoa mai le olataga, ma ō latou ta'utino le pule aoao a le Atua.

Ou te tula'i atu ai ma le fa'aaloalo e fai ai a'u ma sui o le Malō o Samoa, e aloaia ai le Savali fa'aaloalo a le tatou Team Samoa. Lea ua tatou patipatia ile alofa ma le agalelei o le Atua.

Tulouna lava ou paia Samoa. Leaga o oe ole l'a e ivi'ivia, a'ō se la'au tele ma ona a'a, e leai se vave na te toe auauina, po'o seisi na te toe fulisia. Tulou.

A'ō lenei taeao ma lona fa'amoemoe, ua silamiō le mamalu o Samoa ile Savali fa'aaloalo a le Team Samoa. E tusa ma le 332 alii ma tamaitai ta'a'alo ma le Pulega e 101. A tu'u faatasi o le aofai ole Team Samoa e 433, ile aofa'iga o ta'aloga e 24.

O avefu'a ia a Samoa o le'ā masii atu i Honiara, Solomon Islands, latou te finau i totonu o fa'alagamaea nei o Ta'aloga o le Pasefika lona 17, talu ona fa'avae mai ile tausaga 1963.

I le fā o tausaga taluai, ile 2019, sa talimalō ai Samoa i Taaloga o le Pasefika, ma sa molimauina ai se tulaga maualuga o le fiafia, ma le taupati mai o Malō 'ese'ese o le Pasefika, i Samoa nei. Sa molimauna foi le tulaga aloaia o Samoa ile tulaga 3 mai le 24 o atunu'u ole Pasefika.

Ae maitauina ile 332 o tagata ta'a'alo, e 55% o i latou o le itūpā o ali'i, ae 45% ole itūpā o tama'ita'i. O se tulaga taua lenei, auā le sao o tama'ita'i i totonu o ta'aloga ma ona atina'e. Aemaise o le amanai'a o tagata-nu'u uma o Samoa.

E 17 aso ole'ā fa'agasolo ai Taaloga o le Pasefika ma ua faamaonia nei, le masii atu o le aumalaga ale Team Samoa amata atu i le Aso 15, 19 ma le Aso 25 o Novema.

E tusa ma le 24 atunu'u ole Pasefika o le'ā tausiniō i nei Ta'aloga, fa'atasi ai ma Niu Sila ma Ausetalia.

I le vaiaso ua tuana'i sa molimauina ai e Niu Sila ma le lalolagi atoa o le Ta'aloga ole Tāpolo (Golf), se tualaga aupito maualuga ua ausia e se alo tama'ita'i o Samoa (talavou), Faith Vui.

Ua siamupini aoao nei Faith i le Taamilosaga Aloaia a Niu Sila, ale itūpā o tama'ita'i. O se talafa'asolopito lea mo Samoa ona ose ulua'i taimi lenei ua siamupini ai se tama'ita'i Samoa i suega siamupini a Niu Sila.

O le mau po'o se itū agatausili a le Atu-Solomona, auā Ta'aloga o le Pasefika 2023, faimai tatou **Lu'itauina**, tatou **Tūtū Fa'atasi**, tatou **Fiafia faatasi**.

Samoa e, laga ia le mulipapaga.

Ua tatou talitonu ile Atua o Malamalama.

Fautuaga 'a ō tatou tua'ā ua tofāfā mai tiasā.

Tāfesilafa'i ma ulimasao lou sā.

Ia manuia le fa'amoemoe Team Samoa. Manuia foi lau tapua'iga mamalu Samoa.

Soifua.